

CARTA UU JEE NI TEE SAN PABLO APOSTOL NUU TIMOTEO

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō ní cání siquī jeē yíhi yó ndaha Cristo Jesús. ²Te téé ri carta yáha cuájeē nuū rō Timoteo, chi cúu ro nájnūhun sēhe ri jeē maní rī jíin. Te ñūhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sií ni rō.

Jeē nácani de jnūhun Cristo

³Níni tu náā ni rī cacān tahú rī jehē rō nuū Yaā Dios nduú ñuú, te nácuatáhú rí nuū yā jeē siquí rō. Chi nuū maá yá jejníñu ri, nájnūhun ni casáha tāca jíi rī, te íyó ndoo ánuá rī nuū yā. ⁴Te núcūhun ni rī jeē ni ndáhyū rō ná ni quenda ri cuahān rī. Te cúu ni rī ndacoto jnáhan yó, návaha cusíi ndasí ni rī. ⁵Te núcūhun ni rī jeē váha ndije cándíje rō Cristo, nájnūhun ni candíje náná jéhnú rō Loida, jíin náná rō Eunice xihna gā. Te cúcáhnú ni rī jeē suni súcuan cándíje máá rō vijna.

⁶Te jeē yúcuan nástíhví ni rī rohó jéé na cóndíhví gā ni rō jíin táhú jeē

ni jéhe Yaā Dios nuū rō jeē nácani rō jnūhun ya. Te tahū un ní nihīn rō ná ni tee ri ndaha ri xinī rō. ⁷Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnūhun, chi sa sáha jeē iyó fuerza ini yō, jíin jéé cundáhú ni yō jnáhan yó, jíin jéé ndíto íyó xinī yō. ⁸Núu súcuan te ma cúcanu rō nacani ndaā rō jnūhun máá Jítóho yō. Te suni ma cúcanu rō jeē siquí máá rí jeē íne ri vecāa siquí jnūhun ya. Chi sa cuāha rō jnūhun ndoho rō jíin rí siquí jeē cánacani yó jnūhun jnáma ya yohó, núu ndese ni jéhe Yaā Dios fuerza ini yō. ⁹Chi ni jnama ya yohó, te ni cana ya yohó jéé coo ndoo ánuá yō cuajníñu yó núu yā. Te tu ní cána ya yohó síquí jeē váha ni sáha yó, chi siquí jeē ní tee ni maá yá jeē cundáhú ni yā yohó jéé yíhi yó ndaha Cristo Jesús. Chi nde ná tu jecōo ñayíví, te je cúndáhú ni yā yohó. ¹⁰Te vijna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yā yohó. Chi máá Cristo ni snāa yā poder cuehyí jéhni yóhó, chi jíin jnūhun jnáma ya yohó ni steén cají yá nuū yō jeē cótecu yō ní cání chi ma jnahnú ndetū yō.

¹¹Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rī nuū ñayuu tācá nación jeē tu jíni jnūhun ya. ¹²Te siquī un cúu jeē ndóho ri tāca jnūndóho yáha íne ri vecāa. Te tu cúcanu rī, chi jíni rī ndese Yaā cúu Yaā candíje ri, te cúcáhnu ni rī jeē cúu coto ya jniñu jeē ní chihi ya ndaha ri nde vijna te nde quivī ndíji ya.

¹³Te cuiñi nihin ró jíni tāca jnúhun ya jeē steén ndaā, suu jnūhun jeē ni steén rī nuū rō. Te caca ró jíni jnúhun cándíje yó, te cundáhú ni rō jnáhan ró siquī jeē yíhi ró ndaha Cristo Jesús. ¹⁴Te condito ró tāca jniñu váha jeē ní chihi ya ndaha ró, sáha poder maá Espíritu Santo jeē ndeé ini yō.

¹⁵Je jíni rō jeē tāca ñayuu cáyūcu Asia ni castóo i ruhū. Te uū i cúu Figelo jíni Hermógenes. ¹⁶Te jícán tahu rī jeē cundáhú ni Jítoho yō ñayuu vehe Onesíforo, chi cuehē jínu ni nanihin ni rī ni sáha de, te tu ní cúcanu de siquī rī jeē ní ine ri vecāa. ¹⁷Chi sa suhva ná ni quiji de ñuu Roma, te ni nanducú yúcún de ruhū nde ni nanihin de ruhū. ¹⁸Te jícán tahu rī jeē maá Jítoho yō cundáhú ni yā de quivī ndíji ya. Te je jíni váha maá ró ndese yōhyo ni chindéé ñáhán de ruhū ná ni cahíyo ri ñuu Efeso.

**Jeē cúu yó nájñuhun soldado
váha nuū Jesucristo**

2 Núu súcuan te róhó, séhé mání, na cóo fuerza ni rō siquī jeē yíhi ró ndaha Cristo Jesús te sáha ya jeē váha róhó. ²Te tāca jnúhun jeē ní jini ró ní cahān ri, jíto

jínuū ñayuu cuehē, jnūhun ún na nástéén rō nuū tēe cásquícu váha, návāha suni cuu stéén tucu máá de nuū sáva ga i.

³Te róhó na cuándeyí ni rō coto ró jnūndóho, chi cúu ró nájñuhun iin soldado váha nuū Jesucristo. ⁴Ni iin soldado jeē íin nuū guerra, tu sájnéñu de máá de jíni jniñu máá de, chi cánuu jeē sáha de mání máá jéé ndácu tēe ní tejniñu de. ⁵Te suni súcuan tēe cásquícu deporte, ma nihín de premio te núu tú condihvī ni de cosíquí váha de máá modo chíjñiñu. ⁶Te tēe sájñiñu nihin ñuhun, máá de cúu jeē nihín xihna gā jeē cuáha itu. ⁷Nacani ni rō siquī jeē cahán rī, te máá Jítoho yō sáha ya jeē jécūhun ni rō siquī ndíhi.

⁸Te cocuhun ndasí ni rō Jesucristo, Yaā ní quiji yucūn rey David, te ni natecu yā mēhñu ndíyi, nájñuhun cáhán jnūhun jnáma ya yohó jéé nácani ri. ⁹Te jeē siquī jnūhun un ndóho ri jnūndóho, te nde ni cajihni i ruhū íne ri vecāa nájñuhun iin tēe ni sáha cuēchi xeēn. Te jnūhun Yaā Dios chi ma cúu cuhni i jeē ma cuité núu. ¹⁰Núu súcuan te jéndeyí ni rī jíto ri tāca jnūndóho yáha síquī jeē cundáhú ni rī ñayuu jeē ní nacāji ya, návāha suni cācu máá i jeē quivī i ndaha Cristo Jesús, te quihin i nuū cujéhnu i ní cáni. ¹¹Chi ndaā cahán jnūhun yáha:

Núu vēsú na cúu yō jeē siquī yā,
te suni cotecu yō jíni yá,

¹²te núu cuandeyí ni yō ndoho yó,
te suni ndacu yó jniñu jíni yá.

Te núu ma cuajnúhún yó yā, te
suni ma cuajnúhún yá yohó.

¹³Te vēsú tu squícu váha yó, te
máá yá chí mání squícu ya,

chi tu cúu sáfalta yā, chi squícu ya jeē ni cáhān yā.

Tēe sájniñu squícu vāha jíin jnúhun ya

¹⁴Jnúhun yáha na nástíhvī ni rō ñayuu, te cahān nīhin ro jíin i, jíto máá Jítoho yō, jeē ma téjñáhan i siquī tāca jnúhun sáá-ni. Chi tu ndé jéjñiñu cuiti, chi sa stívi ñáyuu jíni sōho. ¹⁵Te nducú ndéyí ró jeē cuajnúhún Yaā Dios rohó, jéē cúu ró tēe sájniñu squícu vāha jíin jnúhun ya, návāha ma cúcanu rō nuū yā siquī ní ĩn, chi vāha nacani ró jnúhun ndaā yā. ¹⁶Te ma quívi nduu rō jíin táca jnúhun sáá-ni ñayīvi yáha, chi suu sáha jeē ndúcuehē gā jniñu néé quívicoo ñayuu cácahān. ¹⁷Te tāca jnúhun cástéén i chi cúu nájñuhun ĩn ndīhyi xeēn jeē sacáhú gá cuahān. Te Himeneo jíin Fileto cúu uū tēe jeē casáha súcuan. ¹⁸Chi tēe un ní cajica yátá de nuū jnúhun ndaā, te cácahān de jeē jé ni cuu ni canatecu ndīyí. Te súcuan cásaca nuu de xinī sava ñayuu cácaandíje. ¹⁹Te Yaā Dios ni jeni ya ñayuu maá yá, te íyó cutú ndaā i jeē ma cáca yátá i, nájñuhun yósó núu tútu ii: Je jíni Jítoho yō Yaā Dios tāca ñáyuu jeē yíhi ndaha máá yá. Te suni cáhān: Tāca ñáyuu jeē ndácunehen síhvī Cristo, na cújiyo i nuū jniñu néé, áchí.

²⁰Te ini ĩn vehe cáhnu íyó cuéhē cohō, nasūu máni cohō oro cohō plata, chi suni cohō yujnu cohō ñuhun. Te íyó jéē fino te íyó jéē corriente. ²¹Te núu ĩn ñayuu sándoo i máá i jeē quénda i nuū tācá jniñu néé, te cuu i nájñuhun ĩn cohō fino. Te coo ndoo coo ii

i nuū Jítoho yō, te nīhin jniñu i ndese cúní maá yá. Te coo tūhva i jeē sáha i tācá jniñu vāha.

²²Núu súcuan te cunu ró coto ró táca jéē tú vāha jeē cándiyo ni tēe suchí. Te condiquīn rō jniñu ndaā, jíin jnúhun cándíje ró yá, jíin jnúhun cúndáhú ni, jíin jnúhun coyūcu máni jíin jnáhan. Te súcuan sáha ró ndé jíin táca ñáyuu ndoo ánuá jeē ndácunehen síhvī máá Jítoho yō. ²³Te ma quívi nduu rō jíin táca jnúhun cánéé ĩi jeē tu íyó cájī, chi je jíni rō jeē sáha jeē tejñáhan ñayuu. ²⁴Te mozo maá Jítoho yō, tú vāha jeē tejñáhan de, chi sa suhva cánuú jéē coo vāha ni de jíin táca ñáyuu. Te coo vāha ni de stéén de, te cuandeyí ni de jíin i. ²⁵Te jíin jéē víta ni de te canī ichi de ñayuu nīhni ni. Chi sanaa te nacani ni i sáha Yaā Dios, te jecūhun ni i ndese íyó jnúhun ndaā. ²⁶Te nducájī ni i te cācu i nuū jexeén jeē ní jniñi ún i, chi ni cundeyí jíin i jeē sáha i jeē cuní maá.

Siquī ndese coo ñayuu sáha néé quívī cuándihi

3 Te suni na jécūhun ni rō jeē quívī cuándihi te quee quívī coo jnúndóho. ²Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá i. Te cahān neé i siquī Yaā Dios, te cunīhni ni i nuū tatá i nuū naná i, te ma nácuatáhú i, te ma chiñúhún i Yaā Dios. ³Te ma cóo manī i jíin jnáhan i ni ma cundáhú ni i. Te sájñuhún i, te ma cúu casī i tāca jéē ndíyo néé ni i, te yōhyo xeēn coo i, te quiti ni i coto i tācá jniñu vāha. ⁴Te suni nastúu i jnáhan i,

te ma yūhú i sáha i cuēchi, te coo ndúxí ndasí i, te nducú i jeē cúsíi ni maá-ni i, te ma nducú i quívi i nuū Yaā Dios. ⁵Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quívi nduu rō jíin ñáyuu casáha súcuan. ⁶Chi sava tēe ún quívi de vehe te stáhú de tǎcá ñahan cánéé jéé iyó ndasí cuēchi. Te yachí quívicoo ña jíin táca jnúhun tú ndaā jeē cúsíi ni ña jíin. ⁷Te vēsú niní scuáha ña na-ni jnúhun, te tu cúu cuíti jecúhun ni ña jnúhun ndaā yā. ⁸Te nájnúhun ni casáha tēe tásí Janes jíin Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeē níjnúní de, chi ma candíje ndije de jnúhun cándíje yó. ⁹Te ma queé jniñu sáha de, chi cuni tǎca ñáyuu jeē tēe cánéé xíní cácuu de, nájnúhun ni cajini ñayuu jeē ni íyo néé xíní ndíndúú tēe jeē ní nducú casi nuū Moisés.

**Jniñu sándíhi ndácu
Pablo nuū Timoteo**

¹⁰Te rǎhó chi je ni cutúhva vāha rǎ ndese steén rí, ndese jíca ndaā rí, ndese tēe ni rí sáha rí, ndese cándíje ri yā, ndese néé ri paciencia, ndese cúndáhú ni rí jnáhan ri, jíin ndese jéndeyí ni rí. ¹¹Chi ni cajito xeēn ñayuu ruhū, te ni ndoho ri jnúndóho. Te jíin rǎ tǎca jéé ní ndoho ri ñuu Antioquía, ñuu Iconio, jíin ñuu Lистра. Te jíin rǎ ndese ni cajito xeēn i ruhū. Te máá Jítóho yǎ ni jnama ya ruhū nuū ndíhi ún. ¹²Chi ndaā cúu jeē tǎca ñáyuu jeē

ndíhví ni cuajníñu vāha nuū Cristo Jesús, ndoho i jeē coto xeēn ñayuu i. ¹³Te ñayuu casáha jniñu néé jíin ñáyuu castáhú, chi sa víhyá gā cocuu i jíin jniñu néé, chi stáhú i ñayuu, te suni candíje máá i jnúhun stáhú.

¹⁴Te rǎhó chi sa cuiñi nihin rǎ jíin jéé ní cutúhva rǎ jíin jéé ní cucáhnu vāha ni rǎ. Chi jíin rǎ ndese ñayuu cúu jeē ní castéén nuū rǎ. ¹⁵Chi nde ná lulí rǎ, te je jíin rǎ ndese cáhán tutu íi jeē steén nuū rǎ ndese candíje rǎ jeē ni jíihí Cristo Jesús jehé rǎ návāha cācu rǎ. ¹⁶Te níí tutu íi cúu jnúhun jeē ni cáhān Yaā Dios, te vāha níhín jniñu jeē steén nuū yǎ, jeē cahán nuū yǎ, jeē náchuhun ichí yóhó, jíin jéé scuéhnu yóhó jíin jniñu ndaā, ¹⁷návāha tēe cájejniñu nuū Yaā Dios, íje ni de te coo túhva vāha de sáha de tǎcá jniñu vāha.

4 Te cáhán rí jíin rǎ, jíto Yaā Dios jíin Jítóho yǎ Jesucristo, Yaā quiji ndacu jniñu, te sándaā yā jniñu ñayuu cátecu jíin ñáyuu ní cajihí. ²Cáhán nihin ri jeē na nácani rǎ jnúhun ya, te stíhví ni rǎ i candíje i. Te níní sáha rǎ súcuan núu núne i chí vēsú tu núne i. Te sáha rǎ jéé na jécúhun ni i, te cahān rǎ nuū i, te caní ichí vāha rǎ i, te jíin cuéhē paciencia steén rǎ nuū i. ³Chi quee tiempo jeē ma cuájnúhún cuíti ñayuu jnúhun ya jeē steén ndaā vāha, chi sa cuájnúhún i jnúhun cúsíi ni maá i, te nducú i cuehē maestro jeē steén nuū i máni jnúhun jeē nújnahan ni i cuni nahín i. ⁴Te cujíyo i nuū jnúhun ndaā, te condíhví ni i tǎca jnúhun jeē máá cuento-ni cúu. ⁵Te

róhó chi níní coo ndito ni rō, te cuandeyí ni rō jíin jnúndóho, te condihvī ni rō nacani ró jnúhun jnáma ya yohó, te squícu vāha ró jíin jniñu ya jeē sāha ró.

⁶Te ruhū chi je ni socō rī maá rí jeē cúu rī, te je cuacuyajni quivī cuu rī. ⁷Te je ni cundeyí rí jeē ní nducú ndéyí rí siquī jniñu vāha, te je ni jinu ni jica ri ñayīvi yāha, te tu ní siáá rī jnúhun cándíje ri yā. ⁸Te vijna je íyó túhva premio jeē nihín rí siquī jeē ní jica ndaā rī. Chi Jitoho yō cuāha ya un núu rī maá quivī sándaā yā jniñu, chi maá yá cúu juez ndaā. Te nasūu núu maá ìin ruhū cuāha ya, chi suni cuāha ya nuū tāca ñayuu jeē cúu ni i jeē ndíji ya chi manī i jíin yá.

Jeē cána Pablo quiji Timoteo nuū de

⁹Nducú ndéyí ró quiji yachī rō nuū rī. ¹⁰Chi Demas ni stóo de ruhū, chi ndíyo ni de ndajniñu ñayīvi yāha, te cuahān de ñuu Tesalónica. Te Crescente chi cuahān de Galacia, te Tito cuahān de Dalmacia. ¹¹Te maá ìin na Lucas íne jíin rí. Te jeē quíji ró, te condeca ró Marcos quiji ró jíin de, chi vāha cuajniñu de jeē chindéé ñáhán de ruhū jíin jniñu ya. ¹²Tíquico ni tají rí de cuahān de ñuu Efeso. ¹³Te jeē quíji ró, te condaha ró cotón jeē ni stóo ri vehe Carpo ñuu Troas. Te suni condaha ró tāca libro, te jeē cánuú gá cúu tācá tutu ní tee maá rí.

¹⁴Alejandro, tēe cúu herrero, yōhyo xeēn ni sāha de jíin rí. Te

maá Jitoho yō cuāha ya yāhu de jeē súcuan ní sāha de. ¹⁵Te condito ró maá ró nuū de, chi yōhyo ni cuu de contra siquī jnúhun cástéén yó.

¹⁶Te ná ni ine ri jeē xíhna ñúhún núu tāca tóhō, te tú ni ìin tēe ní índichi jíin rí, chi ndíhi de ni castóo de ruhū. Te ñúhun ni ri jeē Yaā Dios cone cáhnu ni yā nuū de. ¹⁷Te vēsú súcuan te maá Jitoho yō ni chindéé ñáhán yá ruhū, te ni jēhe ya fuerza ini rī, te súcuan ni sínu ri ni nacani ndíhi ri jnúhun jnáma ya yohó, ni cajini nahín ñayuu tācá nación tu jíin jnúhun ya. Súcuan ni jnama Jitoho yō ruhū nuū tāca tēe xeēn. ¹⁸Te jnama ga yā ruhū nuū tācá jniñu néé, te condito ya ruhū nde quivī ri andiví núu ndácu ya jniñu. Te na cáhán yō jeē yōhyo luu cújéhnu ya níí cáni. Amén.

Saludo jíin bendición jeē sándihí

¹⁹Te cahān rō jeē sándeýí ni Prisca jíin Aquila, jíin ñayuu vehe Onesiforo, achí rí. ²⁰Erasto ni quendōo de ñuu Corinto. Te ni quendōo Trófimo ñuu Mileto, te cúhú de. ²¹Te condihvī ni rō quiji ró nde ná tu quejéé vico mójin. Sándeýí ni rō, achí Eubulo jíin Pudente jíin Lino jíin Claudia jíin tāca gá hermano.

²²Te ñúhun ni rī jeē maá Jitoho yō Jesucristo na cóo ya jíin ró, te Yaā Dios sāha ga yā jeē vāha róhó jíináhán ró. Súcuan na cóo. Amén.